



Broj/Broj: 03/1-50-1-9-2/07
Sarajevo/Сарајево: 27.3.2007. godine

Z A P I S N I K

2. sjednice Zajedničke komisije za odbranu i sigurnost BiH Parlamentarne skupštine BiH održane 27.3.2007., u vremenu od 11,00 do 12,00 sati

Sjednici su prisustvovali članovi Zajedničke komisije: Šefik Džaferović, Jozo Križanović, Vinko Zorić, Drago Kalabić, Dušanka Majkić, Hazim Rančić, Sulejman Tihić, Branko Zrno, Slobodan Šaraba, Ivo Miro Jović i Mirko Okolić.

Sjednici iz opravdanih razloga nije prisustvovao Vahid Hećo.

Sjednici su prisustvovali predstavnici pradlagača akata, kao i gosti:

- Sifet Podžić, načelnik Zajedničkog štaba OSBiH i vojni savjetnik članova Predsjedništva BiH;
- Samir Rizvo iz Ministarstva sigurnosti BiH;
- Brane Janković, šef Odsjeka za NATO i PfP u Ministarstvu odbrane BiH;
- Goran Pranjić, sekretar DMK iz Ministarstva vanjskih poslova BiH,
- Christian Haupt i Dušan Zoller iz Misije OSCE-a u BiH;
- Lejla Dizdarević i Elma Demir iz Štaba NATO-a u BiH;
- Mirsad Žiga iz Ambasade SAD-a u BiH;
- Dragica Hinić, sekretar Zajedničke komisije za odbranu i sigurnost BiH i
- Željko Grubešić, savjetnik u Zajedničkoj komisiji za odbranu i sigurnost BiH.

Sjednicom je do izbora predsjedavajućeg Zajedničke komisije predsjedavao Branko Zrno.

Za sjednicu je predložen sljedeći

DNEVNI RED

1. Razmatranje:
 - a) Izvještaja o učešću Oružanih snaga, policijskih i državnih službenika Bosne i Hercegovine u operacijama podrške miru za period od 1.3. do 31.8.2006. godine, sa zaključkom Predsjedništva BiH (predlagači: Predsjedništvo BiH i Vijeće ministara BiH);
 - b) Odluka o produženju mandata jedinice Oružanih snaga BiH za uništavanje neeksplozivnih ubojnih sredstava u operaciji podrške miru „Iračka sloboda“, broj:01/011-2177-32/06, od 13.12.2006. godine, i broj: 01-011-369-5/07, od 7.2.2007. godine (predlagač: Predsjedništvo BiH);
2. Plan popunjavanja upitnika Partnerskog akcionog plana izgradnje odbrambenih institucija

(PARP)

(sačinilac: Državna međuresorna komisija za PFP i NATO i Ministarstvo odbrane BiH);

3. Orijentacioni radni plan Zajedničke komisije za odbranu i sigurnost za 2007. godinu;
4. Tekuća pitanja.

Predloženi dnevni red članovi Zajedničke komisije usvojili su jednoglasno.

Prije početka rasprave o tačkama dnevnog reda, Branko Zrno informirao je prisutne da je Brus McLane, savjetnik glavnokomandujućeg NATO-a, imao prijedlog svog obraćanja Zajedničkoj komisiji na ovoj sjednici. Međutim, kako je dnevni red već bio utvrđen, te kako su pojedini članovi imali i druge ranije preuzete obaveze, to je gosp. McLainu predloženo da se obrati članovima na narednoj sjednici Komisije.

Potom se prešlo na razmatranje usvojenog dnevnog reda

Ad. 1. Razmatranje:

- a) **Izvještaja o učešću Oružanih snaga, policijskih i državnih službenika Bosne i Hercegovine u operacijama podrške miru za period 1.3.do 31.8.2006. godine, sa zaključkom Predsjedništva BiH (predlagači: Predsjedništvo BiH i Vijeće ministara BiH);**
- b) **Odluka o produženju mandata jedinice Oružanih snaga BiH za uništavanje neeksploziviranih ubojnih sredstava u operaciji podrške miru „Iračka sloboda“, broj:01/011-2177-32/06, od 13.12.2006. godine, i broj: 01-011-369-5/07, od 7.2.2007. godine (predlagač: Predsjedništvo BiH);**

Branko Zrno dao je uvodne informacije o ovoj tački dnevnog reda. Istaknuo je da je Predsjedništvo BiH dostavilo u parlamentarnu proceduru Izvještaj o učešću Oružanih snaga, policijskih i državnih službenika Bosne i Hercegovine u operacijama podrške miru za period od 1.3.do 31.8.2006. godine, te dvije odluke o produženju mandata jedinice Oružanih snaga BiH za uništavanje neeksploziviranih ubojnih sredstava u operaciji podrške miru „Iračka sloboda“. Istaknuo je da je sačinjen radni materijal komisijskog izvještaja o ovim aktima za domove Parlamentarne skupštine BiH, s prijedlogom njihovog usvajanja i potvrđivanja. Nakon toga otvorio je raspravu.

Šefik Džaferović naglasio je da, zbog značaja učešća predstavnika Bosne i Hercegovine u mirovnim misijama i drugim operacijama podrške miru u odnosu na proces članstva u PFP i predstojeći proces priključenja u NATO, Zajednička komisija treba prihvatiti Izvještaj i navedene odluke Predsjedništva BiH i predložiti domovima njihovo usvajanje. Također, neophodno je da Zajednička komisija, u pogledu primjene zakonskih odredbi u dijelu utvrđenih rokova, zatraži njihovo poštovanje bar onda kada se to može, kao što je sada slučaj sa posljednjom dostavljenom odlukom Predsjedništva BiH o produžetku mandata jedinice OSBiH u Iraku. Zato je predložio da Zajednička komisija prihvati prijedlog zaključka domovima da do 7.4.2007. godine okončaju proceduru o navedenim aktima.

Sifet Podžić dao je kraće informacije o postojećoj misiji OSBiH u Iraku. Posebno je naglasio da su koalicione snage predložile BiH da proširi mandat jedinice, tako što bi se uputile dodatne snage koje bi obavljale posao samozaštite postojeće jedinice. Predsjedništvo BiH ovaj prijedlog nije prihvatilo smatrajući ga posebno teškim i rizičnim.

Jozo Križanović imao je određeni broj primjedbi na dostavljena akta. Nije zadovoljan konstatacijom da je zbog kašnjenja u konstituiranju vlasti došlo do kršenja člana 6. Zakona koji regulira navedenu oblast. Preko ovog kršenja postojećih zakonskih odredbi ne može se olako preći. Mišljenja je da je bilo načina da dostavljena Odluka Predsjedništva BiH bude razmotrena na ranijim sjednicama Predstavničkog doma. U kontekstu toga treba uputiti kritike Kolegiju Predstavničkog doma. Druga primjedba odnosi se na nejasno definiran broj pripadnika jedinice OSBiH u Iraku. Naime, u jednom dijelu Izvještaja pominje se 36 pripadnika, dok se na kraju ovog akta, u dijelu

prijedloga angažiranja tokom 2007. godine, navodi broj od 37 pripadnika. To treba korigirati i u odluci Predsjedništva BiH.

Vinko Zorić također je bio mišljenja da je trebalo osigurati kontinuitet u radu Parlamenta. Smatra da su se eventualno o ovim aktima mogla izjasniti i ranije oba doma, i to Predstavnički dom koji je već bio konstituiran, te Dom naroda u starom sazivu, s obzirom da je još uvijek funkcionirao. O ovom pitanju treba se razmisliti, s obzirom na buduće izbore i mogućnost ponavljanja navedene situacije.

Šefik Džaferović saglasan je s mišljenjima prethodnika o neophodnosti kontinuiteta u radu Parlamenta. Međutim, došlo je do nepredviđenog kašnjenja u konstituiranju Doma naroda, dok je Predstavnički dom konstituiran 20.11.2006. godine.

Slobodan Šaraba istaknuo je da bi svi u BiH trebalo da razmisle o prestanku mandata jedinice OSBiH u Iraku nakon 31.12.2007. Ovo mišljenje potkrijepio je činjenicama da je veliki dio BiH zagađen minama zbog čega je upotreba te jedinice potrebna u našoj zemlji. Također, i novi zahtjev upućen BiH za dodatnim angažiranjem naših snaga u Iraku, kako je to navedeno u Izvještaju, ne bi trebalo prihvatiti.

Sifet Podžić odgovorio je na prethodnu konstataciju o zahtjevu za povećanje naših snaga u Iraku. Ponovio je činjenicu da je Predsjedništvo BiH odlučivalo o tom pitanju i nije dalo saglasnost za povećanje naših snaga. Također je naglasio da se jedinica OS u Iraku bavi pitanjem uništavanja neeksplozivnih ubojnih sredstava i da je njena namjena drugačija od jedinica za deminiranje.

Dragica Hinić dala je kratko obrazloženje pravnog aspekta vezanog za navedena akta. Istaknula je da je Predsjedništvo BiH donijelo predmetne odluke o produženju mandata jedinici OSBiH u Iraku, pozivajući se na član 6. Zakona koji regulira ovu oblast, zbog objektivnih okolnosti uslovljenih neblagovremenim konstituiranjem vlasti. U skladu s postojećim zakonskim odredbama, u narednom periodu neće biti potrebe za donošenjem novih odluka za postojeće mirovne misije, već se njihovo učešće treba regulirati u izvještaju, o kojem konačnu odluku donosi Parlamentarna skupština BiH.

Brane Janković naglasio je činjenicu da je BiH postala članica PfP, te da teži pristupanju u NATO. Zato svi od nas očekuju da, pored eventualnih privilegija, damo i određeni doprinos putem svog angažiranja u mirovnim operacijama, kao što je npr. operacija u Iraku.

Jozo Križanović ponovio je činjenicu da svi treba da poštujemo zakonske odredbe vezane za utvrđene rokove donošenja odluka. Zanimalo ga je da li je produženje mandata jedinici u Iraku od sedam mjeseci u drugoj odluci Predsjedništva BiH, a u odnosu na prvobitnu odluku, planirano u predloženom budžetu.

Sifet Podžić dao je potvrđan odgovor na ovo pitanje.

Rezultati odlučivanja

1.a) Nakon rasprave, u skladu s članom 17. Zakona, Zajednička komisija je, sa 10 glasova „za“ i jednim glasom „protiv“, prihvatila Izvještaj o učešću Oružanih snaga BiH, policijskih i državnih službenika Bosne i Hercegovine u operacijama podrške miru za period od 1.3. do 31.8.2006., s prijedlogom plana učešća u 2007. godini, te predlaže domovima Parlamentarne skupštine BiH da ga u što kraćem roku **usvoje i donesu Odluku** o opravdanosti i nivou učešća u operacijama podrške miru za 2007. godinu, na istom nivou učešća kao u 2006. godini, kako slijedi:

- posmatračka misija u Etiopiji-Eritreji- 9 pripadnika;
- posmatračka misija u DR Kongu-5 pripadnika;
- mirovna misija UN-a u Liberiji (UNMIL)-11 pripadnika;
- mirovna misija UN-a na Haitiju (MINUSTAH)- do 7 pripadnika;
- mirovna misija UN-a na Kipru (UNIFICUP)- do 4 pripadnika;
- mirovna misija UN-a u Sudanu (UNMIS)-2 pripadnika.

1.b) Izvještajem iz tačke 2a) predložen je produžetak mandata jedinici Oružanih snaga BiH za uništavanje neeksplozivnih ubojnih sredstava (NUS) u operaciji podrške miru „Iračka sloboda“ u Iraku, koju čini 37 pripadnika. Zbog navedenih objektivnih okolnosti, Predsjedništvo BiH je,

također, produžilo mandat navedenoj jedinici svojim odlukama od 13.12.2006. i 7.2.2007. godine. U skladu sa Zakonom, ove odluke treba da potvrde domovi Parlamentarne skupštine BiH. Kako u parlamentarnoj proceduri postoje navedeni akti koji su dijelom istovjetni, Zajednička komisija je, sa 10 glasova „za“ i jednim glasom „protiv“, zauzela stav kojim predlaže domovima da se učešće pomenute jedinice Oružanih snaga BiH u Iraku regulira donošenjem **Odluke o potvrđivanju odluka Predsjedništva BiH**, broj: 01-011-2177-32/07, od 13.12. 2006., i broj: 01-011-369-5/07, od 7.2.2007. godine, o produženju mandata jedinice Oružanih snaga BiH za uništavanje neeksplozivnih ubojnih sredstava (NUS) u operaciji podrške miru „Iračka sloboda“ u Iraku, koju čini 37 pripadnika, za period od 1.12. 2006. do 31.12. 2007. godine.

1.c) Zajednička komisija usvojila je **i zaključke** čije usvajanje predlaže domovima, a kojim se traži da:

- c.1.-** navedene akte razmatraju jedinstveno u okviru jedne tačke dnevnog reda i to u što kraćem roku, a najkasnije do 7.4.2007. godine, kako bi se ispoštovale zakonske odredbe;
- c.2.-** sve institucije BiH, čije su obaveze jasno regulirane pomenutim zakonom, poštuju jasno utvrđene rokove za dostavljanje izvještaja i planova u parlamentarnu proceduru.

Ad.2. Plan popunjavanja upitnika Partnerskog akcionog plana izgradnje odbrambenih institucija (PARP) (sačinilac: Državna međuresorna komisija za PfP i NATO i Ministarstvo odbrane BiH)

Goran Pranjčić i Brane Janković, predstavnici Državne međuresorne komisije za PFP i NATO, dali su osnovne napomene o ovom međuresornom tijelu. Istaknuli su da je trenutno najznačajniji zadatak ovog tijela koordiniranje rada na popuni PARP upitnika. Ovaj upitnik mora se stalno popunjavati. U skladu sa svojim obavezama, sve institucije iz ove oblasti dobile su dio koji treba da popune, kako bi se upitnik objedinio i proslijedio dalje. Već je urađen i Prezentacijski dokument BiH, a u fazi izrade je i Individualni partnerski program naše zemlje kao članice PFP-a. Tokom jeseni ove godine ministri odbrane i sigurnosti BiH treba da idu u Brisel, kako bi dali odgovore na sva pitanja iz PARP-a ministrima NATO-a.

Branko Zrno istaknuo je da je Zajednička komisija pripremila prijedlog odgovora na upite PARP-a koji se odnose na nju i Parlamentarnu skupštinu BiH.

Rezultati odlučivanja

Nakon kraće rasprave, članovi Zajedničke komisije jednoglasno su usvojili pripremljene odgovore na upite PARP-a koji se odnose na nju i Parlamentarnu skupštinu BiH.

Ad.3. Orijentacioni radni plan Zajedničke komisije za odbranu i sigurnost za 2007. godinu

Nakon kraćeg razmatranja, Orijentacioni radni plan Zajedničke komisije usvojen je jednoglasno.

Ad.4. Tekuća pitanja

a) Poziv Ministarstva sigurnosti BiH jednom članu Zajedničke komisije za učešće u **radionici za izradu Nacrta zakona o zaštiti i spašavanju ljudi i materijalnih dobara od prirodnih i drugih nesreća u BiH, koja će se održati u periodu od 24. do 28.aprila 2007. godine.**

Na osnovu jednoglasne odluke Zajedničke komisije, ovoj radionici prisustvovat će Branko Zrno, predsjedavajući.

b) Poziv Štaba Evropske komande vojske SAD-a u BiH - G.Marshall Centar, za učešće pet predstavnika Zajedničke komisije za odbranu i sigurnost BiH, na konferenciji o temi „Civilno-vojni odgovori u borbi protiv terorizma“, od 11. do 15. juna 2007. godine, u Sarajevu.

Na osnovu jednoglasne odluke Zajedničke komisije, ovoj radionici prisustvovat će Slobodan Šaraba, Jozo Križanović, Hazim Rančić, Dragica Hinić i Željko Grubešić.

c) Hazima Rančića zanimalo je da li, po obavještenju koje je dostavljeno Zajedničkoj komisiji i kojim se traži učešće eksperta u procesu izrade OSCE Kodeksa o ponašanju u vojno-političkim aspektima sigurnosti, treba predložiti kandidata. Ukoliko je to potrebno, on predlaže Šefika Džaferovića.

Nakon kraćeg obrazloženja da je ovaj sastanak predviđen za ekspertni nivo službenika u institucijama BiH, usvojen je prijedlog da ovom sastanku prisustvuje Željko Grubešić.

Zapisnik sačinila
Dragica Hinić

Predsjedavajući
Zajedničke komisije
Branko Zrno